

五
研
齋
詩
鈔

五硯齋詩鈔卷十三

仁和 沈亦然 韞山

青鞋集

人日早起視庭中雙水甕凍裂急覓槌鑿穴冰如椀
許大投小木數段以殺冰力口號示兒穎

乙卯

庭前兩瓷甕積水終年盈開歲苦寒甚冰作鏡面平遂令
甕口豐紋理紛縱橫急覓小槌鑿檐高聲丁丁濺衣霏玉
屑墮地鏘水精纔喜竅容指豈料水逆行過顙濕袍袖兒
子笑且驚俄成椀大穴照見鬚麋清投以咫尺木稍殺冰
力勸人日多樂事煎餅七種羹老翁獨爲此無乃非人情
貧家愛器具瓦缶同瓊甕不惜十指苦聊以示後生

十三日偕仲青岩世綸過陳蘭臯園棋繼以小酌夜
分戴雪而散

新年無事足縈懷棋酒聊邀老伴偕落子故遲因指冷舉
杯常盡爲情諧誰言雪色輸明月只欠梅花種小齋更鼓
迫人扶醉散滿街寒玉濕青鞋

十四日對雪獨酌戲作

寒光坐對引杯長尺許瓊瑤壓草堂若使消來盡成酒年
年三萬六千觴

上元日立春次陳蘭臯韻

朝來賣困晚祠門天上春回正上元綵勝卻慚簪白髮紫
姑爭看賽晴邨踏歌聲裏條風動火樹光中臘雪存卽此

歲豐先有兆，尋常月食復何論。

今年元夕月食

十六日偕陳蘭皋過仲青岩小酌歸途口占二絕句
偶然小飲非傳座，試共清吟莫苦思。如此春宵辜負溶
溶月色上梅枝。

玻瓈瓊滿不辭多，屢舞傞傞側弁俄。不覺欲眠歸路近，燈
街兒女唱吳歌。

食蜺

瑣屑淺水湄，黃白不盈寸。甘與螭螺遊，肯爲湖海遁。漁婦
利所資，挑剝忘困頓。得肉纔滿籃，戕命動逾萬。長街高唱
來，褰裙足力健。獨有梅花時，爭市佐餐飯。
正二月賣者名梅花蜺我聞亦朶頤，出買生憎遲。和醬芼以蒜，舍箸七取之。扁螺好

風味豈惟劉臻知不肖獨自飽分半啖小兒未饑食蜺罪
且作食蜺詩慎勿示蚶蛤恐被若輩嗤

題陳叟見龍畫癡仙

仙夫無懷懂慧甚轉癡絕要亦非真癡聊以恣戲媒手不
鍊金丹口不談道訣睥睨笑羣仙披髮倒持菊問師將何
爲掉頭不肖說

錢武肅王鐵券歌

王氣衝斗牛天生異人臨安鏐黃巢破走董劉滅英雄自
比孫仲謀功高天子恕九死鐫金指日寵渥優臣心如鐵
誓不改永爲國守十四州堂中客樂侃侃山頭錦覆滿滿
五代兵戈一瞬餘四傳基業分陰短虎符龍節散無存煌

煌鐵券傳子孫此真乾寧皇帝物梁唐冊馬烏足論三樓
遺址遠莫考但有湖水當祠門兒童猶唱花開曲不管遊
人聞斷魂

熊生元昌餉越釀一盛外施藻繪絕異常罇詢之曰
此女兒酒也凡越人遣嫁之夕必以羊酒先之故名
女兒酒此卽其壻家轉遺者視他酒尤佳余喜其名
頗新因爲作歌

鏡湖水春更綠越州米粲於玉炊飯釀酒嫁女兒不數蒲
萄與醪醕和風拂拂桃天天滿街簫鼓聲喧嘈魚軒未發
酒先往何以佐之雙柔毛女兒酒在甕爺孌心隱痛四目
著擔頭直逐黃塵送女兒酒在卮姑嫜酌醕之酒味雖易

辨婦心良難知女兒女兒聽我歌莫嫌酒少誇酒多願汝
爲婦似酒厚承床基福垂永久願汝爲婦似酒醇無違夫
子宜家人老夫此歌不輕作要與女兒書置座煩生傳語
娶婦家一字一壺不爲過

曹雪芹紅樓夢題詞四首

名園甲第壓都莊鴝鴦年年鑒稻梁絕代仙姝歸一處可
入情景悵雙光花欄夜宴雲鬟濕雪館寒吟繡口香只有
顰顰無限恨背人清淚漬衣裳
兩小何曾割臂盟幾年憐我我憐卿徒知漆已投膠固豈
料花偏接木生心血吐乾情未斷骨灰飛盡恨難平痴郎
猶自尋前約空館蕭蕭竹葉聲

仙草神瑛事太奇
妄言妄聽未須疑
如何骨出心搖日
永絕枝連蒂並時
獨寢旣教幽夢隔
遊仙又見畫簾垂
不知作者緣何恨
缺陷長畱萬古悲

月老紅繩只筆間
試磨奚墨爲刊刪
良緣合讓林先薛
國色難分燕與環
萬里雲霄春得意
一庭蘭玉晝長閒
逍遙寶笈琅函側
同躡青鸞過海山

野菜詩

明餘姚滑浩有野菜詩數十篇托物寓言頗有深意
因擇其中名最新別者亦繫以短歌得十六首

剪刀股

春采生食兼可作蔬

剪刀股滿道傍
不裁羅綺入纖手
卻與兒女充飢腸
飢腸

雖无愁似繭煩爾今宵爲吾翦

燕子不來香

早春采可食燕來時則腥故名

燕子不來香提筐采采當早嘗不見呢喃語晝梁自飽那
管人無糧

猫耳朶

正二月采搗爛和粉麪蒸食

猫耳朶奈何聾縱鼠竊我甕米空甕米空還啖汝耳朶耳
朶能幾許

猢猻脚跡

以形似名二月采之熟食

猢猻脚跡緣階繞宅舍爾芋栗壞我禾麥我非狙公當是
魚宏莫憶三峽請遊釜中

眼子菜

生水澤中青葉背紫色莖柔滑而細長六七
月采可熟食

眼子菜如眼不轉睛年年盼爾倉箱盈昨夜水來沒田屋
民無粟官食肉安能如爾肯張目

破破衲

臘月便生正二月采熟食至三月卽老矣

破破衲可食不可著鹽少許水滿勺閉門自煮鏹折脚古
來尚有吞氈人請君飽嚼休嫌貧

猪殃殃

猪食之則病故名春采熟食

猪殃殃人食轉無傷不知何人充猪腸富家猪自餘糟糠
何不殺之餉鄰里與爾同飽猪殃殃

看麥孃

隨麥生隴上因名春采可熟食

看麥孃守麥熟麥未熟充爾腹充爾腹兮誠不辭願君牀
頭語妻兒麥黃莫忘青青時

狗脚跡

生霜降時葉如狗印可熟食

狗脚跡自何來縱橫壠上掃不開霜風一夜寒如許爾不還家人啖汝

雁腸子

二月生如荳芽生熟皆可食

雁腸子誰棄爾肉療人飢腸在此螻蟻不慕鳥不視畱與貧人供菽水

抱娘蒿

叢生故名二三月采可熟食

抱娘蒿叢生纏結何堅牢生同根分死同釜誰能更受分離苦奈何有兒去鄉土

羊耳禿

二三月采熟食

羊耳禿薄無肉徧郊原誰爲牧吾家籬破不用觸爾若能

來不爾逐

雀兒棉單

蔓延鋪地而生故名三月采可作蓆

雀兒棉單盈阡被坂生闌干雀兒自暖人自寒胡不都變棉花彈

草鞋片

二三月采熟食

草鞋片棄捐誰肯戀只應蹤跡野人家休思踐踏笙歌院今年田無一粒收十千斗米人填溝借問明珠履一飽能如草鞋不

牛尾瘟

生深水中葉如髮莖如藻冬月和魚煮食

牛尾瘟細如髮當守爾牛莫令齒牛飢但瘦身牛瘟必禍鄰牛尚不食何況人薄言采之聊救貧

燈蛾兒

二月采熟食

燈蛾兒化作草菲菲想因投火斃不若療人飢成團逐隊
塞柴扉莫更撲燈飛

秋齋偶詠二首

圖史縱橫硯不塵卻從忙裏寄閒身秋花滿院無人掃午
睡醒來誤認春

更無來往閉門居盡日含毫只著書多謝亂蟬憐冷落青
林齊唱晚涼初

蟋蟀

昨夕又今夕長鳴復短鳴只因寒故近未必嬾能驚離壁
尋無處篝燈夢不成難禁風雨夜斷續應檐聲

絡絲娘

婦女不知蠶績秋來聲滿空堂自愛孤輪曳繭無庸東壁
分光

驟雨聲中益急殘燈滅後偏譁如邀鄰女共績一夜縑絲
幾車

八月二十九日清芬堂對桂持螯

好花莫如桂佳味無過蟹人生當此時不樂亦童騃天界
杳然高虛堂淨如洒瓊條紛窠窠霜螯堆叢夥口鼻養得
兼雖醉不肖罷停杯問桂花何不四季敷天葩如聞桂花
語貪心只恐天譴汝撫盤問螯蛸可能終歲恣吾求如聞
螯蛸哭我曹何辜充爾腹始悔醉後言語狂寒士得此非

尋常更浮大白謝花蟹綠橙搓手爪甲香頰然白髮歌慨
慷

重九後三日同周紹頤宗濂陳蘭臯過仲青巖食蟹
觀菊夜深雨作始散

左手持螯右手酒一年此樂難常有況對秋花爛熳開高
低五色陳盆缶人生到此尚含愁更問何時開笑口主人
好客興頗豪自啟泥封肯謀婦家庖不禁擘尖團免俗未
能烹豸牡詠凋蠶起笑脫頤杯盞橫飛戰以拇更移花入
燭高燒瘦影玲瓏紛戶牖花香酒氣兩不妨醉面華顛各
忘醜燭頻見跋知夜深雨忽打窗催客走向花揖別花無
言試問花嗔唐突否拖泥帶水且歸去明日重來盡三斗

前詩結語有明日重來盡三斗之句青巖復開尊招
飲因疊前韻

我詩意本不在酒乃竟重過旨且有多君愛詩不惜錢謬
以黃鐘譽瓦缶更拭看花眼復哆談天口無乃婪酣笑厨
婦主人酒池能拍浮陳子酒戶去關牡却憐周君強入脣
此苦無殊決駢拇菊花比昨益精神時有寒香流棟牖欲
插滿頭歸花應嫌老醜欲題醉中詩筆媿龍蛇走夜深僕
倦酒轉多借問君家卮漏否未須愁我玉山頽歸步倭僮
看珠斗

宿雨初晴曉關甫啟仲青巖遣僮送菊花十餘枝率
賦四韻奉謝兼預乞來歲菊苗

晴鵲楂楂聽欸關金刀翦送菊花團已經霜後香猶在尚
帶宵來雨未乾相對卻慙前度醉能畱休怯小齋寒明年
擬乞青苗種把瑣邀君日日看

題曹石倉畫二絕

涼風白日滿江河搖落偏添客思多輸與野鳬無一事美
蓉花下弄清波

幾朶紅雲壓淺流碧荻蒲裏翠鳬浮憑君妙筆兼崔艾寫
出寒汀一段秋

重修表忠觀歌

祠外湖水平祠中青草生舉頭何所見古瓦竄鼃遊人
讀碑解懷古俗兒爭說射潮弩不聞解橐葺頽垣但見畱

題滿壞堵只今煥然新者誰大府首倡以次隨王之後人
實督役朱門碧瓦開宏規要非務不急揭虔妥靈祥所集
不見湖山風雨夜時有五王旌蓋入當年奮挺一匹夫豈
思廟貌崇故都唯其順天惜民命食報自與尋常殊

前題代人所作

名馬玉帶真英雄不與九國同始終全吳保越歷三世盡
厝赤子衽席中龍山啟宇表功德穹碑十丈雄文刻元明
至今僅一遷碧殿朱門湖岼側龍衣玉座天人姿四王侍
坐旒覆眉緬懷鐵弩潮頭日想見提壇籍戶時湖山風雨
易侈剝飛鼠巢梁蟲穴桷像圖黥昧祈眈稀空有題詩在
壁角中丞慨然割俸錢一唱百應羣爭先工成牆柱動光

彩但存後觀非侈前乃知功德勝爵位今昔褒崇曾不異
春秋俎豆奉祠官豈是虎符金券致雲旂搖搖龍車來綺
疏朱戶相當開中丞卽事神降嘏嘏音假江海安流祥慶下

前題再代人作

峩峩層構當湖隄靈旗玉座神所棲江山保障四大字淋
漓元氣

御筆題邇來梁桷漸撓折丹青剝落金碧黯祠官走告守臣
倡工鳩材庀速不稽視前費棟益飛動影落百頃青玻瓈
此本王家苑中地徙築新宮自明季斗牛無孛憶當年陌
上開花想遊騎滿堂珠履客三千一劒寒鉉州十四過眼
煙雲八百秋只有南山自蒼翠紛紛割據笑羣雄積骸醒

血神民恫豈如吳越順天命百年安堵無兵戎平生每疑
五代史所載不與蘇碑同持簿責負事或有大勝驅置戈
矛中千秋俎豆允稱功寶馬年年下碧空

臘日

柳條應未漏春光臘鼓無聲日景長何暇預春年計米試
來先漉玉浮梁是日漉酒村童不解金剛舞鄰舍誰分釜粥香
一笑甞人思暴富典衣歲歲買黃羊

十二月十三日大雪周紹頤招飲同集者仲青巖陳
蘭臯明日報以長歌兼呈陳仲二君

君興真清絕買肴沽酒不怕沒踝雪我輩真酒徒衝風支
繖不用滑處扶入門兩脚硬如鐵但見寒光照氈席深杯

到口似淋灰知君酒多能不惜融融登春臺耳熱面發赤
不知門外雪幾許笑問主人今夕是何夕且停金叵羅聽
我豐年歌瑞雪不在多宜蠶作繭大如甕宜田秀結九穗
禾歌終把盞問滕六一夜天葩翦何速偏教我輩酒腸寬
其如寒者無衣服滕六不言我醉欲眠踏歸路兮瑤田到
家扶醉看靴底泥滓淨盡勝洗滌只有雪花吹著鬚鬢邊
攬鏡一笑莫辨白與玄天下無神仙但願從君輩自此更
醉三十年炙硯作歌報盛筵更能白戰吾請先

嘉慶初元正旦恭紀四韻

丙辰

春風駘蕩滿乾坤旭日祥光照紫闥

父子親行堯舜事臣民重被覆持恩

兩宮祐篤隆千古

三聖心傳共一言我是望雲空戀闕也隨呼拜不關門

是日與衆紳士詣覺海寺望闕行禮

三月廿一日曉過湖趺瀆望道場諸山

湖趺瀆北卽仙區妙手丹青未易摹夾岸好山堆曉黛滿湖春水浸浮圖雲帆忽卽知城近葑草新添覺道迂追憶昔遊曾幾日重來今已白髭鬚

趙松雪故居二首

更從誰與辨門牆銀杏無枝蔓草長

宅有大銀杏樹二株今枯

只有甘

棠橋下水年年流出墨雲香

賈區湫隘保傭叢占斷當年數百弓木石成灰何足惜道

人原住水晶宮

登峴山題壁

高下亭臺曲磴平
腐蕘燒棟未全傾
湖山入眼仍如畫
簑笠浮家已負盟
繞郭野田桑麥綠
出城遊舸管絃清
石尊閒久生塵土
逸老今誰續姓名

遊弁山法華寺

夾路松陰一徑灣
卅年今又款禪關
入門不改梁朝樹
尋壁猶餘宋旭山
雲外竹通泉脈遠
日中僧飯戒壇閒
何出得枕公垂石
一覺空亭到晚還

攜酒登浮玉山獨酌

吳興山水窟
造物工陶鎔
又將一片玉
浮作水面峰
雲根

時出溪下疑負者龍只恐隨流去縹渺誰能蹤瘦塔立百
尺好事名芙蓉影落碧波裏顛倒雙錐鋒我來正清曉舍
舟策孤筇山高不尋丈頗具岡巒重磊磊似紗帽山石無大小皆
作紗帽形秀氣天獨鍾欲竊負之去巨靈悵莫逢周遭千頃碧
微風吹溶溶青山夾兩岼蒼翠曉更濃船過沙鳥起渚淺
游魚喁雜花映桑麥清謳發艣舫方覺意甚適翻愁酒不
供笑彼畫船客誰歟瓢榼從是日城中人出遊者甚多

天寧寺觀唐人尊勝陀羅尼經石幢

尋幽入古寺遠吠雪色龍禪房春寂寂老木青樅樅俯仰
何所有兀然見經幢殿前樹旣對門外立復雙石滑不生
蘚剝落類杵撞語尚可句讀文或譌逢逢年月盡唐代姓

名半愚憇胡曹與凌渭

皆書幢人

體格淳不厖胡尤得師法我

見心則降始信竹垞翁跋語非幻曉會昌除佛寺督責守

令懣蘭若無梵唄招提失高麗厄遂及碑版毀作礎與砭

此幢獨完好往來衆所睭呵護藉佛力墨妙畱名邦俗僧

不知寶筏視同罌缸安保百年後不作繫馬椿相對不忍

去久勞兩足躩急欲就模搨攜歸置齋窗

四月十九日同蔡柳堂高秋崖郭蓉塘映華程之康

竹坪集潘亞江小浮查分韻得隈字

脚力偏能犯曉來

是日余最先至

玲瓏舴舻八窗開故交酒客兼

詩客小景山隈復水隈繞座墨香人灑翰

是日余爲亞江書便面蓉塘竹

坪亦各書行草一紙

遮檐葉密鳥窺杯醇醪未盡休愁暮不到扶頭

不肯回

次韻潘亞江酒樓述懷之作

舉琰相看有底愁
此樓瀟灑勝書樓
干邪氣自冲牛斗
鼠王名誰辨鄭周
守拙我慙囊底智
能贏君戀掌中鬬
尊前老伴今無幾
百斛何時共拍浮

北軒落成仲青巖雨中送新篁二竿栽之墻角口號
二絕奉謝

移來冒雨壓肩頰
倒屣開門迓綠卿
纔減君家陰少許
小窗添得搖風聲

但解栽培長不難
休勞往復訊平安
十年老圃琅玕徧
償與先生一百竿

北軒醉歌

讀書苦夏熱草草構北軒梁柱大如臂檐瓦高可捫階前
數弓地繚以八尺垣從人乞蕉竹種之東牆根青旗搖寒
碧明玕掃燉溷當窗設几榻有書無壺尊人或笑朴隘我
謂勝蓬門不見亭午時炎曦爍乾坤解衣臥窗下鳥雀靜
不喧鮮飈冷然來其樂何可言貧人願易足斗室當名園
請看連雲第幾家及子孫

漫成

曉來卽起晚來眠晴雨關門野性便課子澆花消白日吟
詩作字看青天濁醪數盞心悠爾脫粟三餐腹果然只有
點金無妙訣囊中用盡買山錢

家煒賓因疾薤鬚作歌索和戲次其韻

療病必去鬚古來此論無人道不圖初始乃自君濯濯頤
頤看絕倒亦知嫁禍及無辜妄冀沈疴一朝好丈夫何必
定鬚眉繞啄諸毛轉可惱金刀削處清涼生攬鏡欣然對
昏曉豈無皮裏根株畱只許根株皮裏老勸君此方莫浪
傳從此人間長鬚少

高孝廉鳳詔余友秋崖仲子也植品好學登乾隆甲
寅賢書丙辰報罷仍畱都門鍵戶讀書學業益進今
春復下第俶裝歸省途次得熱疾醫者治以下劑悞
於同行某堅持不藥中醫之說僕某又駭不曉事竟
致不起未抵家數舍而歿時五月四日也訃至詩以

哭之

忽漫傳聞事竟真爲君酸鼻更驚神奄然一舸長眠日正
是全家引睇晨不藥中醫徒妄語傷心永訣向何人相看
惘惘安歸咎只恐難言問水濱

才華深斂行無疵少壯羣中汝是師逸足暫停追電轡狂
颺頓折拂霄枝從來天壽天難問個裏殃祥事可疑擬約
平生爲君傳何由緘寄九原知

河橋看解雨中維兩載渾如一飯時枉棹空思過我室聞
於清江浦買舟日尚擬枉帆過我老年翻作哭君詩千金身爲浮名悞百
里魂歸故土遲夢裏青驄華表鶴何年方是暫還期

鳳仙花二首

名葩佳卉任爭誇此亦紛披爛似霞天與貧人伴幽獨一年常看半年花

頻開頻落只尋常豔色何曾讓衆芳正爲無香轉幽絕不教蜂蝶略猖狂

此花不生蟲蠱蜂蝶亦多不近

哭高茂才攀桂三首

凶問偏頻至三旬兩度驚可憐賢伯仲相繼去蓬瀛空舍遺妻子泉臺有弟兄傷心雙白首淚雨幾時晴

偶爾人間世前身是導師維摩常臥病懷素愛臨池

君多病工書捷撒懸崖手先知易簣期

未歿前一日與家人訣曰來日午後當歸矣已而果然

去來真自在嗷嗷復何爲

相別三旬耳幽明頓爾分徒揮兩行淚剩把一篇文慧業

臨潭月塵緣過眼雲我慚非鉅筆敢信足傳君

尊甫秋崖以行畧來

求傳故云

送李邑侯廢芸改令平湖兼誌去思

難留君爽佛空祈兩載仁聲我略知衆瘼自蠲由不擾羣
姦能燭只無私一官仍似諸生日將去還如始至時翹首
秀州猶咫尺看公連最擁旌麾

題志燦兄小照二首

清閑庭院早秋時漸覺涼生碧玉枝兀坐灑然無一事撚
髭不是爲吟詩

老來何事足怡情繞膝兒孫玉琢成顛倒阿爺綳帙亂背
人時學讀書聲

過仲青巖觀菊次邱丈省齋韻

彈指經年別黃花又索詩淡添秋圃色瘦比壽翁姿香氣
寒浮瑤霜華夜點墀相要同晚節肯羨錦成帷

十一月二日雪後過仲青巖觀菊口號

天葩如絮積庭墀盆菊猶存爛熳枝不道傲霜還傲雪豈
容無酒更無詩精神肯爲寒威減風味難教熱客知好待
早梅開數點一般高潔竟同時

五硯齋詩鈔卷十四

仁和 沈亦然 韞山

青鞋集

正月十四日同陳蘭臯踏雪過仲青巖圍棋卽嘗家
釀醉後各賦詩一篇而散并訂明日燈街之遊

丁巳

新正半月兩逢雪老伴三人四舉杯交道淡於初熟酒春
光全在欲開梅

時庭梅將放

偶然得句吟休苦隨意敲枰倦卽

推明日上元燈市鬧重來須到夜深回

元夕後一日坐雨縱筆

莫笑蒼顏五十三齒牙目力我差堪長年但有銜杯興老
境何須啖蔗甘傘屐可憎非健步市廛猶近羨茅菴醉濡

墨汁狂吟罷自折瓶梅喚妾簪

仲青巖陳蘭臯過訪小酌適有餉糟四腮鱸者命奴
蒸嘗之既過火候魚肉盡化而以其洎饋相對啗噉
頃青巖和章猶挂齒頰不置因疊前韻再博一粲
消盡銀梭亦可哈不須下箸但斟杯卮奴豈是烹鮮手醉
客聊充解渴梅浪說并刀堪細切虛教蓴菜與同推吳兒
絕倒漁翁泣從此收竿捲網回

作前詩後二日復煮鱸魚如法再疊前韻解嘲

如法烹來莫再哈爲渠更盡十分杯堆盤玉破鬆如雪到
口糟香和勝梅塵俗老饕誰解憶東南此味故應推明朝
便去長橋釣不得千枚不肯回

詠燈

一寸熒熒照壁楹此功星月豈能爭不分茅屋與華屋常
伴書聲同紡聲未必結花皆利市偶看騰燄卜陰晴家居
若盡濱然海永夜應添數倍明

流波山下有然海千里民汲之以代油光明過油數

倍

去年九月送大兒穎迎婦大名尋聞運河水漲盲風
時作幾斷行旅憂愁不能成寐臘杪始得平安之報
惟歸期須在中春老懷略慰然倚閭之望益勤矣昨
宵夢其挈婦來歸因爲此詩須其至以示之

昨宵夢汝娶婦歸笙簫沸耳銀燭輝璿瑜竝立拜堂上巾
牽氈轉歸房闌我方衍衍宴賓客雄雞一聲天欲白嗒然

二石方金卷一
二
衾枕寂無人依舊關山千里隔去年送汝蘇州城丁寧言
語昏到明相期不得過三月約畧預計水陸程臨行把酒
酌僮僕要渠事汝心力并豈知繞膝二十載一朝使汝成
孤征歸來心似風中蠶長日如年心益躁況聞秋水溢江
河加以盲風肆狂暴中途進退恨皆難兩字平安倩誰報
未教新婦拜姑嫜先令老人生悔懊窮冬纔得北書來歸
期約在桃花開迄今開歲已弔月烏啼鵲噪空疑猜人生
婚嫁固當早秦晉豈如鄉里好入門漫說琴瑟調請看吾
爲汝愁老

同顧春波瑪瑙寺觀牡丹口占三絕句

寺外遊人鬧似雷寺中花發錦成堆空將脚力隨君盡未

必天香惹袖回

曲檻斜廊畫不如一欄花放午晴初女兒各自矜顏色若
個虛心道逕渠

幾回欲去又遲遲落日風前有所思只恐此花貪富貴卻
嫌吾輩坐題詩

楊花爲蛛網所罥感賦一絕

憑藉春風盡日吹纔沾綉戶又穿帷不因蛛網罥渠住如
此顛狂到幾時

四月二日新市觀賽東西二祠社神兩首

鉦聲如沸聒晴空西社纔過又賽東戶捨金錢供酒脯筆
調粉墨畫兒童冠袍已換新花樣絃管猶鳩老樂工喜煞

樓頭諸女伴紛紛遙指竹簾中

排列威儀聽指揮疏疎密密忽相違河橋折處靈旗轉桑
柘陰中寶蓋飛樂利閭閻蒙

帝力清和風日上龍衣市人評笑村人舞送到祠前各自歸

嫁婢

人生無貴賤昏嫁當及時豈因使令乏老彼青春姿憶昔
入門日短髮纔覆眉蒲伏拜堦下頑駭一無知教養歷歲
月始解烹與炊邇來益曉事百役隨指麾尤善伺茶酒頗
於衰病宜已了十年債爲脫雙足縻願爾宜家室願爾無
非儀椒蘭生糞壤寧必姜與姬迎輿在門久去去莫涕垂
久苦鼠暴從仲青巖乞猫一頭近始斂跡賦詩謝之

吾家黠蟲惡不悛圖書破碎衫履穿早知姑息自貽患白
老已迎三載前君家狸奴皆好種朝求夕至何慨然黑身
白足尾株短坎口鋸耳金睛圓一鳴已令鼠膽裂防逸姑
以麻繩牽夜來縱之繞房闔卑身屏息不肖眠大鼠深藏
小者出搏無空反獲必連咬嚼骨肉聲膈膊如人啖豆栗
爆烟邇來終夜絕啾唧得無遠徙或暫遷我謂多殺亦無
益斂威靜鎮效更遄不見古來名將守邊塞先聲所至能
使戈矛捐爾貓爾貓當勉旃飢有食兮寒有氈慎勿前猛
後示弱羣小轉得狎侮牙爪邊感君割愛息鼠暴作詩代
聘銜蟬錢

題云亭山人桃花扇傳奇後二首

興亡自取復何疑
官爲金陵王氣悲
只恐深山無史讀
網羅遺事作傳奇

一載君臣過耳風
桃花扇血尚殷紅
秦淮生色鍾山笑
不道青樓勝鉅公

次韻仲青巖對菊四絕句

有奴能藝菊
歲歲好花枝
不厭招人看
知渠雅俗宜
卻向春初種
偏於秋末開
伴君同老壽
一任衆芳摧
五色無凡豔
高低滿屋中
下簾然燭照
大勝月當空
動借君家酒
來看瘦影寒
笑吾茅屋後
久負數弓寬

海鹽馮助教
桂芬辱訪畱
飲觀所藏趙
千里上河圖
并明人六十八家墨迹口占二首

久與故人別來尋委巷廬交相問年歲時復笑鬢往事
紛難述貧家醉易圖畱君一日住盡此百錢沽
君飛未盡翰我已久泥蟠問我橐中有請君紙上看雖難
救枵腹頗謂勝明珎莫浪爲人語能來月一觀

貸錢買梅二本山茶玉蘭各一本種之小圃

年年苦無買樹錢但種芭蕉呼綠天一經霜雪盡朽腐依
然濯濯如童顛昨者貸錢購四樹如法種之軒窗前山茶
玉蘭各綻藥兩梅兀立雙癭仙從今次第候花發眼底足
供三月妍明年誓不多飲酒酒錢約略歲十千三年更種
六十本牆邊屋角柯鉤連四時口鼻得兼養老夫於此性
益便只恐芭蕉著不得修竹彈汝當避賢移根他所還汝

全

贈汪杏圃鳴鑾

少年意氣驪一言不合如剝膚當時同袍三十輩惟我兩人越與吳姓名到耳非不熟吾心無子子無吾老來意氣平擇交益慎愛冷人多君濶略肯先顧我急走蒼剡畦畛彼此相視付一笑往事兒戲莫復陳論文劇飲數來去臭味已似平生親君不見世人締交在頃刻轉眼青松落顏色豈若惡始而美終如食之欖味回得最哉久敬永爲則不寐

黑甜鄉似隔風濤力薄終宵怨巷醪轉側太多衾易冷憂思紛集枕徒高羨他頑婢鼻如吼怪底寒雞噤不號無那

披衣起敲石惱人燈炷鼠銜逃

瓶中蠟梅

似蠟雕成蠟不如檀心最久開初年年滿貯銅瓶水迎得黃香伴讀書

金刀翦贈最絲枝不上釵頭照硯池更把珊瑚補疎處南天竹實亦離離

汪杏圃次韻見酬仍疊前韻荅之

相馬得精可忘羸相人在骨不在膚無鹽醜惡使齊霸西施豔質終忘吳文章駭俗亦如此大怪小怪何傷吾君才抑塞休不平從來鄭璞逢周人力田豈必盡豐歲肯使稂莠生隰畛愛君老來益好學縱橫一室圖史陳個中滋味

頗不惡妻孥而外此最親衆人紛紛事篆刻羊質虎皮驕
見色破碎規矩越準繩謬謂匠心能獨得安得吾儕樹之
則

夢劉叔雅作

久不見叔雅昨宵夢遇之豪氣殊未減已白領下髭語言
雜游戲宛如聚首時醒來記不得殘燈照牀帷昔試吏畿
輔同袍六十五伊人最矯矯羞與儕偶伍睥睨喜罵人獨
不敢予侮久之竟定交如以水投乳旣而各之官音問同
憂歡有事謁大府會城畱盤桓出行輒聯轡痛飲忘夜闌
相勗無別語要使閭閻安君尋改大縣予亦忝剡薦相距
僅二程郵筒捷於箭每因于役過歲得四五見信宿不言

行摩挲到爐硯君既久不遷予亦遭平鐫蒙恩仍錄用久
病當避賢南還不獲別作書情縣縣豈料登車日尚有一
面緣揮涕各分手此會知何年歸來音問隔今豈不如昔
書浮石頭城身乏凌風翮前聞北人言君以憂去職邇來
雖服除無乃耽泉石光光諸城劉相業無瑕九方伯有惠
政遺愛畱南州叔雅爲大學士文正公從子君承世澤久
不當爲身謀梧桐待鸞鳳康莊馳驊騮但爲卓與魯何必
公而侯予心更私冀冀君宰吳地扁舟訪故人徑入不須
刺傾耳聽仁聲拭目觀政異豈不勝夢中恍惚渺難記

十二月十五夜里中火作勢甚迫近同兒子輩略爲
摒擋俟火至去之已而反風火亦隨息悸定爲賦二

十韻

人聲出出衆大噪忍寒躍起倒著袍推窗照耀半天赤黑
煙怒捲江翻濤忽如巴蛇吐長舌檐楹仰舐星斗高又如
羿射九日落金流石爍肌煎熬萬千瓦聲一時解似聽春
冰碎長篙灰埃百物只頃刻何異爐冶燎秋毫由西而東
勢益烈若添之薪沃以膏元冥收威顓頊遁誰能更與回
祿鑒巡檢下令徹小屋恨無人捷如猿猱紛紛捆束壓肩
背撞搪道路相呼號我雖禍福聽天命至此意亦難堅操
先裹書畫匣爐硯衣笥次及約以絢汗流足趼手爪禿力
倍婢僕忘其勞區區所值能幾許然亦大勝空手逃須搖
驟起東風颺炎官返駕紫蕭韜乃知天符自有限豈必喫

以纈巴醪比鄰慶慰謝神佑我亦首下高厥尻徒薪遠竈
戒婦女物還故處令兒曹卻憐迤西被焚者如鳥失巢豕
失牢安能一一庇宇下卒歲暫免心忉忉

南天竺

滿穗紅圓訝許同碧琉璃葉一叢叢爲防鳥啄兒童折收
拾珊瑚入網中

結實時人家
多結網護之

扶搖無力木爲關辟火常愁百榦難愛煞曉來遭雪壓闌
然斜露一枝丹

十二月十八日立春書壁

老健終年硯北身案頭圖史總無塵殘冬却值青春始短
鬢應添白髮新生菜盤聊斟酒滿索道人恠打門頻無錢

底用逢春早吹徧春風不救貧

歲尾書悶

問余懷抱幾何寬世事征營慮百端愁絕轉思親筆硯債
多偏計到杯盤馬牛老爲兒曹作風雨貧知友道難安得
翛然侶猿鶴青山無價日賒看

除舍作

貧家何所有唯有塵埃多或若蛛布網或若燕營窠或若
墨灑壁或若蛇尾拖偶然狂飈起撲面同飛蛾年年逼歲
暮始一思揩磨持斧斫竹篠爲繩析麻搓縛之長竿首散
若九穗禾酌酒命健僕肘露頭不科操此入堂室左拂右
復摩霏霏還冥冥緇及庭中柯走視此僕面黑漆似鬼魔

內外積寸許擔負約十籬急欲淨家具狂思挽天河老妻
勞指顧嬾婢屢見訶洗拭三日畢脫然蠲積疴曾聞蓬萊
山樓觀鬱嵯峨纖塵飛不到神仙時來過我欲移家住奈
隔弱水波弱水不可渡置酒且高歌屋塵尚如此心塵可
若何

偶成

彈指歸來又七冬狐裘雖暖已蒙茸偶然中酒天初雪不
敢過人客少蹤往事易尋花下坐名山難見畫中逢歲除
贏得妻兒笑生計年年愧老農

元日書壁

戊午

莫訝先生尚掩關醒來猶是醉中顏花衫綉帽兒曹樂珠

三石齋詩集卷一四
九
朵金鈿女隊間但覺晝長過往日居然街靜似深山一年
詩債今重始大草淋漓滿壁間

同日對庭梅口占二絕

繖屐終宵往復還

除夜雨

家家過午不開關日長我更無些

事坐共梅花一樣閒

梅花笑我醉未醒我對梅花獨自斟莫倚春風都放盡從
容畱與伴清吟

新正四日柬仲青巖汪杏圃

不見止數日悠悠已二年梅花期子久詩句讓吾先天暗
連朝霧蒼青往歲錢能來共斟酌菱栗勝豚肩

招雪樵小飲

人各添一歲心同樂早春舉頭天界大入耳鳥聲新閒月
莫忙過素心無強親好將平日興來盡越醪醇

庭梅正開又值風雨感而有作

如何小院初肥日又值東風作雨時早計失於爲幄晚先
開悔不放花遲寒香減處春終在清豔消來本定滋明日
晴曦滿天地含苞猶有最繁枝

同杏圃踏雪過仲青巖飲杏圃不勝酒陽醉邊墜遂
扶以歸明日作詩寄示卽次其韻荅之

醉後見天趣老來懷舊朋身閒心似水風勁酒疑冰但覺
春光好都忘歷日增玉山佯倒地螳臂尚能勝

正月十一日夜漏下十刻乘興踏月忘路遠近興盡

始返明日仲青巖遺詩一篇以過門不入爲言次韻
荅之

鏗然曳杖去還來此興清於月底梅非我過門忘入室怪
君鍵戶獨銜杯隔橋燈火寒無燄一路汙泥凍不灰未是
寂寥形伴影相隨遮莫漏頻催

遊鳴因寺望果山諸石作

紅牆老樹鬱蒼蒼綠水當門泊野航笑我與僧無款曲嬾
移筇屐過僧房

歷落欹欹一望收何須更上見山樓寺中有山樓生公妙法誰
能說頑石年年不點頭

元夜同仲青巖陳蘭皋仲慶生妻姪陳巖大兒穎紫

金橋踏月過汪氏水竹村庄故址坐羿家墳大磐石
上清談良久而返

第一回圖今夜月誰宵關門坐兀兀走邀老伴羣從隨不
踏燈街步林樾紫金橋外行人希河水灣環堆阜凸汪園
遺構一無存但有荆茅刺袍韞緣河曳杖聲鏗然攀樹踰
溝勢勃窣古墳前頭磐石寬尊卑雜坐禮儀闕杳杳原隰
爛如銀皎皎寒光清入骨狂歌喚起墓中人長嘯驚翻林
際鶻今年月勝去年明今宵興比前宵越鬼神不出避清
遊蟾兔下窺疑鶴髮明宵當更攜酒來違者深杯十分罰
休誇火樹與星橋一任途人自奔突

十六日夜與大兒穎踏月仍用元夜詩起句足成七

律一首

第一回圓今夜月無七里長新市街老夫既醉興不淺兒
子願從行可偕春燈三點五點好短笛近聽遠聽佳賞心
脚力不須盡草露已濕雙青鞋

吳穀人侍讀予告還里頃有揚州之行迂道過訪談
飲竟日重申卜居西溪之約恐終不能遂耳感賦二
首卽以送行

天上冰銜客能來亦偶然顛毛各如此酒戶大非前穀人近不
勝妄意溪邊屋曾無賴上田揚州十萬貫何日解腰纏

長物唯詩卷尊前互把看老方甘苦喻遠自唱酬難去日
春江漲歸時白露圓穀人歸期約在秋間西谿秋色好期子暫遊觀

喜雨作

春風吹草無寸碧河底惟餘水半尺田頭老農慘不歡十日不雨必無麥夜來忽聽聲蕭騷密密疎朝復夕從他深巷屐膠泥已見農人手加額共云去年水沒田五畝惟收穀一石輸入官倉尚不充安得私家升斗積貨錢糴米過新年兒童無履雙脚赤冬來三月雨雪稀麥壟都作龜兆圻昨宵縣隸又打門新賦舊逋齊督迫已分此身溝壑填豈意天公沛膏澤蘇枯達活一夜間稜稜青蔥迴非昔雨暘過此固難知眼底生機自驛驛明朝縣隸如再來剜肉醫瘡非所惜我聞此語心欣然好雨寧徒爾憂釋不見蔬苗菜甲多半枯一觔十錢買求益蒸藿例供寒士餐并

此無之口安適從今韭嫩芸薹肥作羹作菹日一易遲爾
新麥價如土不托起洩隨意擇濡毫爲作喜雨詩草破書
齋雪色壁

久雨初晴明日正值花朝次仲青巖韻

推窗白日挂簷前洗出青青雨後天風暖桁衣初減潤氣
蒸樓瓦尚含烟尋花鳳子垂鬚嗅浴水鳬雛曬翅眠好買
紅牋爲裁翦明朝黏在牡丹邊

俗以花朝爲花生日輒
翦紅牋遍黏花木間

蔡柳堂凶問至哭賦二首

此信宜遲轉不遲未開緘已淚先垂微疴豈爲庸醫悞小
別翻成永訣悲古誼一生公論在交情卅載九原知從今
雅集清遊地盡是愴懷感舊時

寥寥親友幾人存不料今朝又哭君老境啖留垂盡蔗盲
風吹散暫停雲神期若在三更影意氣全消四尺墳地下
故人知不少冥冥花外好論文

北軒新栽白芍藥初放口占三絕

數朵先開半尺寬石闌高下雪成團玉盤盂豈貧家識兒
女都呼白牡丹

扶疎草木繞吾廬畱住殘春只有渠映月誤疑窺粉面狂
香一縷酒醒初

椎冰碾玉刻玲瓏風韻應勝柳浦紅愛煞綠裳翻縞袂年
年四月一相逢

妾舉第四子作九言歌一篇

古語五十以後不生子我已得三今又舉此兒呱呱索乳
終夜攪爺睡躁怒直欲拔關掩耳馳貧家十口尚苦食不
足增此贅癩無乃自取之客聞予言啞啞笑不止豈意妖
夢翻在占熊羆彭澤五子北窗臥自足簞瓢雖空未聞兒
死飢君幸少一家又未甚窘忽爲是論方知陶公癡我聞
客言如病得良醫惜無橐金更買娉婷姬賢愚天壽貴賤
任若輩眼前生活無過手把后不見霜者兩鬢雪者髭客
來客來與爾同飲斯

庭草

豈是滋生易都緣斬艾稀種多名不辨土瘠葉仍肥有意
藏虺蜥無心塞砌扉昊天方長汝姑俟冷霜飛

北牆十姊妹盛開無慮數千雖錦屏不及也作歌調之

千花百花一夜開問渠姊妹何處來陸離照曜目五色粉牆化作雲錦堆正如隋家殿脚女綵帆錦纜經行所不辨誰爲吳絳仙一例紅顏喧笑語又如王衍幸青城柳眉桃臉紛隨行飄飄馬上雲霞服唱罷甘州無限情吾家廢圃名花少梅樹枝低翠篁小多卿姊妹不嫌貧伴我清吟幾昏曉昨宵風雨損芳容敢辭作幄爲裁縫只愁別我暫歸去要到明年此日逢

壽仲青巖七十

人生七十不爲異七十康強未易尋壁上赤藤看久挂手

中銅斗愛深斟觀書老眼明如鏡截餅堅牙利似金一笑
少男方毀齒知君有羨老彭心

黔粵風霜二十年歸來蕭散作神仙不從鳥道羊腸過官
斷名韁利網牽美意自勝丹在鼎長生誰見海爲田從今
更莫推辭醉我卽洪崖任拍肩

紫牡丹

葛巾乾道種分殊似蘸南昌海水塗一色東來函谷氣半
開宵映仲謀鬚紫羅襦解香初發丹的腮融醉未蘇說與
畫工煩點筆燕支和墨不和朱

淡芭蕉

笛材中天截爲簫千縷黃金一瞬空時見絮雲生口脛誤

疑香氣透簾櫳嘗來滋味酸醎外破盡工夫吐納中翁媼
癖耽兒女效不知於世竟何功

觀汪杏圃與仲青巖圍棋二絕

庭梅葉大牡丹殘小院棋聲子滿盤局上可憐爭劫急了
無關繫是旁觀

楚蜀跳梁半賊氛

時楚蜀小寇未盡殲滅

看人書劒去從軍一枰何

與蒼生事卻把輸贏抵死分

四月十一日小雨初歇汪杏圃招飲醉賦四韻

志豈在口腹形須忘主賓論詩貧事業把瑣俗仙人樹濕
飛殘雨庭陰變晚春借君琴作枕暫愛夢中真

列子古莽不衣而多眠五旬覺以夢中所爲者實覺之所見者妄

送蠶行

立夏前天氣驟熱蠶種易生倍於他歲貧人市既不售遂盡育之已而桑葉翔貴窮於稱貸矚近邨饒於桑者乘夜置蠶門前而去明日其家見之收飼者十無二三殊可憫也爲作送蠶行

五日青六日白

見秦觀蠶書

七日蠶生倍往昔半畱自育半售

錢持問途人盡蹙額歸來不計陌上桑但囑家人勞莫惜初猶采桑縷切之勻洒筐中以次益儻儻漸大食轉多風雨聲疑出四壁未曾雨伏桑已空貸錢先指田中麥葉價農增暮更昂三倍搖頭未肯摘錢多葉少蠶又飢肯向河流供一擲對蠶大哭蠶不聞滿籜昂頭索葉迫豈無肉可

刻飼汝不肖食豈無女可賣無主爲誰役鄰村富家錢如山數頃桑陰接天碧夜深四顧寂無人送到門前各還宅還宅蕭條一室虛燈前老幼交相責年年蠶少賣新絲今年蠶多無寸帛田中之麥徒青青償却前逋餘幾石蠶生蠶死任他家只愁身作溝中瘠城中大戶那得知芍藥欄邊方宴客

閱邸抄知王殿光霽山歿于霸州之營田官舍愴然有作

三年赤縣竟除名

霽山令大興以公事削職尋責耕霸州營田

破格

君恩許督耕老去書生親稼事死來田畯署銘旌黃河風浪

歸魂夜

霽山睢州人

舊雨天涯屑涕情從此欲刪愁飲序六人

已半隔幽明

辛丑試吏畿輔朝夕過從者子與霽山及諸

備共六人更番作會一月中至十餘子因爲愁飲序已而
各宰一縣合并甚稀十餘年來高歿於秦孫歿於楚今霽
山又故矣撫今
憶惜不勝悽然

陳丈岳生挽詞

空谷幽蘭只自芳明珠入匱玉韜光山中室宇依麟士帳
後笙歌薄季長白髮一編猶在手青燈三世卻同堂存無
遺行亡何恨笑指蓬萊是故鄉

訪汪杏圃不遇見夜來所鼓琴尚橫几上歸而戲之
以詩

推戶不見君惟有琴橫几阿戎爲予言爺昨偶無事焚香
理七絃夜分猶未已不知誰知音官爲披衣起我雖不解

彈略能說琴理響逸由氣和質良資手美此心苟不閒凌
亂誤宮徵羨君有古琴羨君善劫倚惟願聞其心志山或
志水更遠市廛居築室幽篁裏彼時從君聽觸挽唯意擬
回回令我悲裴裴令我喜即使琴無絃妙意常在指今姑
入囊中毋徒驚俗耳

再題病足圖仍疊前韻

歸來畢影茅檐下越布裁衫纔拂踝習勞薙草更澆花往
往青苔鞋底惹昨宵兒女展圖看笑指爺今非躡者奈何
不去作官人兀坐齋頭將筆把豈知把筆緣無田雖不療
貧勝遊治我自甘爲伏卵雌官教人呼望火馬有花有酒
有書看此後餘年盡天假鷗鵬志天衢麋鹿喜山楚性各

有所便誰能與物且舊時藤杖好收藏有伴遊山吾往也

再題滌硯圖仍疊前韻

圖中人今歸矣五硯依然真可喜屋前屋後盡環河常洗
松火泛流水松烟流水泛年年不盡齋頭乞書紙豈真十
指如懸槌點黜還之姑爾爾憶昔未歸時形勞神亦疲堂
前掃案牘堂後綴文詞兩僮磨墨滿硯池淋漓狂草日不
輟但能滌硯任取之歸來臭味更不惡石本無苗安望穫
黃金散盡結交遊誰肯如渠共憂樂往年穴壁偷兒來此
獨畱之不屑攫不然流落入風塵礪斧支牀安所托久已
斷此生研磨老我謝世營有時面黔令守墨有時去垢令
質清不題長卿柱嬾書晏子楹塗乙滿紙筆無聲要與石

泓論今古彼口雖啞眼自明黃牒小兒豈解事披圖一笑
意頗輕兒長女大已非昔無田可畊無布織不怪老夫衫
袖烏更請營錢市端石

哭子四首

春來里中多患疹比戶傳染往往不治入夏後彌
甚五月七日三子願患此症越十日亡廿四日大
兒穎繼之越六日又亡嗚呼老年不幸乃至斯乎
慟餘賦此焚示二子地下

老去遭奇慘旬餘哭兩兒神明吾行負恩怨爾心知月幌
荒荒白風旛颯颯吹暗傷居此世百歲亦何爲

二

硯裏猶渚墨窗前半掩書臥牀曾幾日坐席已雙虛余三子皆
自痛轉嫌人慰尋難到鬼居不祥疑草木直欲付芟除今年
庭中花木多焦枯者

三

弟也方長逝兄旋不食新有妻爲少寡無子慰衰親庭訓
空能秉家聲孰與振鬻書謀瘞汝了此卅年身

四

果未花先剪禾纔穗已鎌旣教雙卵碎何用一枝添今年三月
余又舉一子枕淚痕誰見頷髭白自拈細思無可悔只課讀書
嚴